

DOMINGU XXXI TEMPU KOMÚN – TINAN A

Tema

Liturjia Domingu XXXI Tempu Komún nian konvida ita ba reflesaun kona-ba ita-nia komportamentu nia seriedade, lialoos no koerénsia ho Maromak no ho Reinu. Ho forma espesiál, leitura sira interpela animadór sira comunidade sarani nian kona-ba lialoos sira-nia sasin nian, pureza sira-nia motivu nian, empeñu iha konstrusaun comunidade sira ne'ebé kompromete an ho valór sira Evanjellu nian.

Evanjellu apresenta mai ita grupu “farizeu” sira-nian. Nia kritika maka’as sira-nia pretensaun soi lialoos nian ho modu ezkluzivu, sira-nia inkoerénsia, ezibisionizmu, laran toos ba domin no mizerikórdia. Liufali informasaun istória, Evanjellu konvida sarani sira atu keta husik atitude sira ne’e tama iha família sarani no harahun fraternidade, fundamentu comunidade nian.

Iha *leitura dahuluk* “Jahwéh nia manu-ain” ida interpela amlulik sira Israel nian. Maromak bolu sira atu sai “Na’i lalehan ho rai nia manu-ain sira”, atu hanorin Lei no gia Maromak nia Povu, maibé sira husik atu interese egoista domina sira, la halo sira-nia devér, halakon Lei nia kbiit. Nune’e sira mak responsavel boot ba divórsiu entre Israel no nia Maromak. Jahwéh fó sai katak nia labele tolera hahalok ne’e no sei hasai sira-nia autoridade no máskara sira.

Leitura daruak apresenta mai ita, Paulo, Silvano no Timóteo nia ezemplu – evanjelizadór sira comunidade sarani Tessalónica nian. Husi esforsu misionáriu halo ho domin, ho haraik-an, ho simplisidade, ho gratuidade, moris mai comunidade ida nakonu ho fervór, ne’ebé simu Evanjellu nu’udar Maromak nia don, hodi kesi an ba nia no fó sasin ho lialoos no koerénsia.

LEITURA I – Mal 1,14b-2,2b.8-10

Naran “Malaquias” la’ós naran própriu ida. Nia signifíkadu mak “ha’u-nia manu-ain”; ne’e mak título ne’ebé profeta anónimu ida foti ba nia an. Nia mak profeta ida husi períodu pós-ezílíku. Iha ninia época, harii fila fali ona Templu (kf. Mal 1,10) no kultu funsiona fali ona – maski la loos (kf. Mal 1,7-9.12-13)... Maski nune’e, entuziazmu ba rekonstrusaun la iha ona; tanba Maromak nia promesa la kumpre, Povu dezanima no monu iha apatia religioza no lakon konfiansa tomak iha Maromak... Sira duvida kona-ba Maromak nia domin, kona-ba Ninia justisa, kona-ba Ninia interese ba Judá. Rezultadu buat ne’e hotu bele haree iha kultu (la iha ona interese) no iha étika (aumenta falla sira, injustisa sira, arbitrariedade sira). Kuadru ne’e, liutiha restaurasaun Templu nian, situa ita iha metade dahuluk sékulu V mK (entre 480 no 450 mK) besik liu ba Esdras no Neemias nia época.

“Maromak nia manu-ain” ida-ne’e reaje ho forsa hasoru situasaun ne’ebé Povu Judá nian monu bá. Nia tau sira ida-idak iha sira-nia responsabilidade ba Jahwéh nia oin no ba maluk sira, ezije konversaun Povu nian no reforma iha vida kultu nian. Ninia lójika mak lójika deuteronomista: se Povu ulun toos atu tuir dalan infidelidade ba Aliansa, nia sei haree filafali mate no terus; maibé se Povu fila ba Maromak no kumpre ukun-fuan sira, nia sei koko fali moris no ksolok ne’ebé Maromak oferese ba sira ne’ebé tuir Ninia dalan sira.

Testu Malaquias nian ne’ebé ohin propoin mai ita halo parte períkopa naruk ida iha-ne’ebé profeta denuncia kona-ba falta respeito dezprezu ne’ebé comunidade judaika sente ba Jahwéh nia naran (kf. Mal 1,6-2,9). Sira ne’ebé iha kulpa ba situasaun ne’e mak, liuliu, amlulik sira... Loloos sira mak ema uluk atu potencia relasaun entre Povu no Maromak; maibé, preokupa ho

interese pesoál no ho espíritu lukru nia kbiit, sira oferese iha altár aihan foer (kf. Mal 1,7), sakrifika balada delek, kudeik eh moras (kf. Mal 1,8), hodi halo kultu hahalok sira espresaun, la'ós domin nian, maibé indiferensa no falta respeitu nian husi povu ba Jahwéh.

Hatodan ho salan korrupsaun kultu nian, amlulik sira iha kulpa ida boot/grave liután: sira falsifika maka'as Maromak nia Liafuan. Ne'e mak kestaun ne'ebé ita-nia leitura ohin refere.

MENSAJEN

Malaquias iha konxiénsia katak Jahwéh halo "Aliansa ida ho Levi" (kf. Mal 2,4-5), iha ne'ebé amlulik sira simu nu'udar miasaun hanorin Lei ba Israel no apresenta sakrifísiu sira iha Maromak nia altár (kf. Dt 33,8-10). Foti sira nu'udar "Na'i lalehan ho rai nia manu-ain" (Mal 2,7), amlulik sira loloos tenke rejenta hahalok aat, koñese Maromak nia Lei no apresenta nia ho modu fiél ba Povu, la'o ho Jahwéh iha dame no hahalok loos, hadook Povu husi aat (Mal 2,6).

Iha realidade – Malaquias hateten – la'ós ida-ne'e mak akontese. Amlulik sira la hasees an de'it husi Lei no ukun-fuan sira, maibé mós halo Povu monu, hodi hanorin ho forma kleuk. Envezde orienta Povu iha dalan Aliansa nian, sira dezvia nia dook husi Maromak... Sira mós la konsidera ema hotu hanesan no hili ema (profeta refere ba tratamentu lahanesan ne'ebé amlulik halo ba ema riku no ema kiak, ba ema kbiit-na;in no ema ki'ik).

Maromak la simu atitude no komportamentu sira hanesan ne'e... Tan ne'e, Jahwéh sei deskualifika no hasai amlulik lasoi sira-ne'e nia autoridade, hamoe sira iha Povu tomak nia oin. Ema hotu sei haree katak sira la iha ona Maromak nia konfiansa no hasai tiha ona husi sira autoridade atu sai testemuña Maromak nian.

LEITURA II – 1 Tes 2,7b-9.13

Bainhira hakerek Surat Dahuluk ba sarani sira iha Tessalónica, Paulo hela iha Corinto. Husi Tessalónica, liuhusi Timóteo, Paulo simu notisia di'ak: Tessalónica oan sira kontinua haka'as an atu moris, ho fidelidade, Evanjellu ne'ebé Paulo haklaken ba sira. Difikuldade loroloron nian, formasaun doutrinál kuran/defisiente, nune'e mós opozisaun husi autoridade sira Tessalónica nian la hamenus membru sira comunidade ne'e nia entuziazmu. Sira mak, loos duni, modelu ida ba comunidade sarani Grécia tomak nian. Nune'e, Paulo hakerek, hodi fó korajen atu kontinua sira-nia dalan fidelidade nian ba Jezús no ba Evanjellu. Nia aproveita mós atu esklaresese kestaun ruma ho karákte doutrinál no atu korrije aspetu ruma vida comunidade nian. Ita iha metade dahuluk tinan 50 eh 51.

Iha kapitulu tolu husi surat nia inísiu, Paulo agradece Maromak ba nia asaun ba comunidade nia di'ak (kf. 1 Tes 1,1-3,13). Maski iha tempu badak de'it, comunidade moris no metin, no ne'e tanba Maromak nia intervensaun. Paulo nia fuan nakonu ho ksolok no agradesimentu...

Depoizde orasaun hahí nian ba Aman Maromak no ba Na'i Jezús Kristu, ne'ebé halo posivel milagre Evanjellu nian iha Tessalónica (kf. 1 Tes 1,2-10), Paulo hanoin ho emosaun, nafatin iha klima agradesimentu nian, comunidade sarani foun entuziasta ne'e nia inísiu (kf. 1 Tes 2,1-12).

MENSAJEN

Iha leitura ohin nian, Paulo hanoin hikas, misionáriu sira ne'ebé evangeliza Tessalónica nia komportamentu.

Apóstolu hahú hodi deskreve Paulo, Silvano no Timóteo nia domin ba sarani Tessalónica nian, hodi uza ilas inan nian... Misionáriu sira "hanesan inan ida ne'ebé tau matan ba nia oan

sira ne'ebé nia hakiak" (vers. 7b) no hatudu iha momentu no situasaun hotu, sira-nia domin, ternura no afetu ba Tessalónica oan sira. Sira halo an ki'ik, umilde no simples, no nunca trata ema ida ho loko-an eh superioridade; sira hadomi ema hotu ho domin ne'ebé serví no laho interesse; sira serví comunidade ho forma total no inkondisional no tahan serbisu no kolen hotu laho lamentasaun eh laran todan; sira fahe ho membru comunidade sarani nian, la'ós de'it Evanjellu, maibé moris rasik (vers. 8).

Hafoin. Paulo hatudu misionáriu sira nia gratuidade... Aleinde haklaken Evanjellu, sira mós serbisu "kalan no laron" atu la sai todan ba ema ida comunidade nian (vers. 9). Kona ba "serbisu" karik Paulo refere ba halo tenda, ne'ebé nia aprende bainhira sei labarik, iha Tarso, husi nia aman. Profisaun ne'e mak tulun nia moris (iha Corinto, bainhira Paulo hela iha Priscila no Áquila nia uma– kf. Apóst 18,3) no halo nia identifika an ho ema hotu.

Buat ne'ebé importante mak ne'e: Paulo no nia maluk sira la haklaken Evanjellu ba interesse pesoál, atu hetan rekompensa materiál. Buat ne'ebé dudu sira mak interesse Evanjellu nian no ema hotu, mane no feto nia salvasaun.

Ita-nia testu remata ho referénsia ida ba oinsá Tessalónica oan sira simu Liafuan ne'ebé Paulo no nia maluk misaun nian haklaken: sira simu "la'ós nudar ema nia liafuan, maibé nu'udar Maromak nia liafuan", ne'ebé serbisu iha fiar-na'in sira nia fuan no nakfilak sira (vers. 13).

Komunidade sarani la'ós de'it rezultadu/fuan husi Liafuan ne'ebé haklaken, maibé mós Liafuan ne'ebé rona, simu no moris tuir. Tessalónica oan sira, husi kedas inísiu hatene katak Liafuan ne'ebé haklaken ba sira mak Maromak nia Liafuan no la'ós Paulo nia liafuan eh pregador sarani naran de'it ida nia liafuan. Iha prosesu anúnsiu nian, simun nian no tranzmisaun Evanjellu nian, ita hotu tenke iha konxiénsia katak buat ne'ebé importante la'ós instrumentu umanu ne'ebé haklaken Liafuan (maski nia hatene dada ema no matenek), maibé proposta ne'ebé, liuhusi instrumentu umanu ne'e, Maromak halo mai ita.

EVANJELLU – Mt 23,1-12

Evanjellu domingu ne'e nian lori ita dala ida tan ba Jerusalém, laron ikus sira molok Jezús nia terus no mate, laron konfrontu final entre Jezús no judaizmu. Líder judeu sira kontinu lakohi proposta Reinu nian no prepara prosesu kontra Jezús.

Pasajen ohin nian mak introdusaun ba diskursu naruk ida kondensasaun nian husi Jezús kontra líder relijiozu sira Israel nian (kf. Mt 23,13-36). Iha diskursu ne'e mak mosu "susar ba imi, eskriba no farizeu sira..." famozu hitu. Ba Mateus, diskursu ne'e mak Jezús nia resposta ba judeu sira nia fuan toos atu simu Maromak nia proposta sira.

Mateus tau iha Jezús niaibun apresiasaun negativa liu ba eskriba sira (especialista Eskristura nian, no barak mak farizeu) no farizeu sira. Loloos, farizeu sira mak fiar-na'in entuziasta, buka koñese no haka'as an atu kumpre didi'ak Lei Moisés nian. Sira nafatin presente iha vida relijioza israelita sira nian no buka kuda iha Povu respeitu ba Lei, atu Israel sai ba beibeik, Povu santu ida, dedika an ba Jahwéh no moris iha Jahwéh nia prezensa. Sira mak grupu sériu ida, ho intensaun di'ak, haka'as an duni ba comunidade israelita nia santifikasaun. Sira-nia fundamentalizmu iha relasaun ba Lei, mak dalaruma hetan kítika husi Jezús. Hodi afirma superioridade Lei nian, sira dalabarak despreza Ema no kria iha Povu sentimentu salan no indignidade nian ne'ebé hatodan konxiénsia sira... Sira haluha tiha esensial – domin no laran-sadia. No hodi konsidera sira-nia an mak "puru"/moos no moris tuir Lei, sira despreza "am aretz" ("povu ki'ik sira") ne'ebé tanba ignoránsia no moris todan ne'ebé sira enfrenta, labele kumpre tomak ukun-fuan sira Lei nian.

Parese Jezús la iha opiniaun maka'as liu hasoru farizeu sira. Ita presiza hanoin katak Evanjellu Mateus nian mosu iha parte final sék. I (dékada 80), bainhira farizeu sira mak korrente dominante judaizmu nian no iha tempu ne'ebá sira mak inimigu públuku sarani sira

nian iha moris loroloron. Liufali hatudu Jezús nia opiniaun kona-na farizeu sira, nia apresenta ilas ne'ebé sarani sékulu dahuluk nian iha kona-ba judaízmu no sira-nia líder sira.

MENSAJEN

Ita-nia testu fahe ba parte rua. Iha parte dahuluk, Jezús halo retratu ida farizeu sira nian (vers. 1-7); iha daruak, Jezús fó konsellu ruma ba dixípulu sira atu keta nakfilak an ba “farizeu sira” (vers. 8-12).

Farizeu sira mak tuur iha Moisés nia kadeira (vers. 2). Espresaun ne'e refere ba autoridade ezkluziva farizeu sira fó ba an rasik atu interpreta Lei Moisés nian (iha Mateus nia tempu, la'ós iha Jezús nia tempu) . Farizeu sira hetan akuzasaun katak sira sai na'in tiha ba Maromak nia liafuan no halakon nia kbiit ho regra sira, norma sira, obrigasaun legalista sira, envezde favorese enkontru ema nian ho Maromak, sira hadook liután parseiru rua ho Aliansa.

Daruak, dehan katak sira inkoerente (vers. 3). “Sira ko'alia maibé la halo”. Sira-nia hahalok la koerente ho sira-nia laifuan no hanorin sira. Sarani sira simu konvite atu rona sira-nia hanorin sira – buat ne'ebé sarani ho orijen judaika halo – maibé la banati tuit sira-nia ezemplu.

Datuluk, sira tau naha todan no labele lori iha ema nia kabaas (vers. 4). Farizeu sira nia eziénsia hatodan ema fiar-na'in sira nia moris, tanba lei, obrigasaun sira , proibisaun sira mai husi lei, barak demais. Tanba ema labele koñese no kumpre lei sira ne'e hotu, hamosu iha ema konxiénsia foer no salan nian ne'ebé hatodan ema nia konxiénsia no halakon ksolok. Situasaun ne'e hamosu moris ida nu'udar atan Lei nian.

Ikusnian, farizeu sira gosta hatudu sira nia fiar no piedade/orasaun nu'udar espetákulu no ezibisaun ida. Buat hotu sira halo atu ema haree sira nia superioridade, no halo publisidade kona-ba sira-nia fiar no orasaun. Sira ho sira-nia loko-an, hanaruk sira nia kaixa ho fita (iha laran iha liafuan sira Torah nian, ne'ebé israelita sira uza, bainhira tinan 13 ona, durante orasaun dadeer nian) no hatais nia ninin (franja tau iha mantu ni akantu haat – tallît – ne'ebé judeu harohan-na'in tau iha kabaas durante orasaun). Buat ne'ebé interese sira mak imajen ne'ebé sira fó, rekoñesimentu husi ema no título sira onra nian.

Ba sarani sira, oinsá sira tenke moris? Saida mak sira tenke kuidadu atu farizaízmu la tama iha Jezús nia Igreja?

Fundamentalmente, comunidade sarani sai comunidade fraternidade nian (vers. 8: “imi hotu mesak maun no biin-alin”). Kreda la forma husi “superiór” no “súbditu” sira, “mestre” no “dixípulu”sira, “aman-inan” no “oan”, sira “doutór” no “alunu” sira, maibé nu'udar maun no biin-alin hanesan, no iha Aman ida de'it (vers. 9: “imi nia Aman ida de'it, ne'ebé iha lalehan”) no tuir Kristu hanesan (vers. 10: “imi-nia doutór ida de'it, Kristu”). Iha Jezús nia Kreda labele iha ema ne'ebé hakarak manda ema seluk, eh ema ne'ebé konsidera an importante liu, merese liu ema seluk nia onra, preparadu liu ema seluk... Iha Jezús nia Kreda labele eziste, tuir ilas estrutura ierárkika judaika, eskema ida komplikadu grau nian, tuir comunidade nia membru ida-idak nia dignidade. Iha Jezús nia Kreda título sira onra nian, fatin rezervadu sira, luta ba fatin dahuluk, la halo sentidu ida. Iha Jezús nia comunidade, domin no servisu de'it mak tenke iha fatin dahuluk (vers. 11: “imi ida ne'ebé boot liu, sai imi-nia atan”).

Komunidade sarani tenke haklaken ho modu profétiku Maromak nia Reinu... Iha Reinu Maromak propoin ba ema sira no Jezús inaugura, Aman de'it (Maromak) no Oan-Mane (Jezús) mak okupa fatin ida onra nian. Sarani sira, ho dignidade hanesan, mak maun no biin-alin; sira tenke hadomi malu entre sira no sai servi-na'in ba malu.